

საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის მინისტრის

ბრძანება №9/ნ

2026 წლის 24 მარტი

ქ. თბილისი

„ფსიქოტროპული მედიკამენტებისა და სპეციალურ კონტროლს დაქვემდებარებულ ფარმაცევტულ პროდუქტთან გათანაბრებული სამკურნალო საშუალებების გამოსაწერი ფორმა №2 ელექტრონული რეცეპტის ბრუნვის წესის დამტკიცების თაობაზე“ საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის მინისტრის 2022 წლის 8 აპრილის №01-31/ნ ბრძანებაში ცვლილების შეტანის შესახებ

„ნორმატიული აქტების შესახებ“ საქართველოს ორგანული კანონის მე-20 მუხლის მე-4 პუნქტის შესაბამისად, ვბრძანებ:

მუხლი 1

„ფსიქოტროპული მედიკამენტებისა და სპეციალურ კონტროლს დაქვემდებარებულ ფარმაცევტულ პროდუქტთან გათანაბრებული სამკურნალო საშუალებების გამოსაწერი ფორმა №2 ელექტრონული რეცეპტის ბრუნვის წესის დამტკიცების თაობაზე“ საქართველოს ოკუპირებული ტერიტორიებიდან დევნილთა, შრომის, ჯანმრთელობისა და სოციალური დაცვის მინისტრის 2022 წლის 8 აპრილის №01-31/ნ ბრძანებაში (www.matsne.gov.ge; 08/04/2022; 470230000.22.035.016960) შეტანილ იქნეს ცვლილება და ბრძანებით დამტკიცებული დანართის („ფსიქოტროპული მედიკამენტებისა და სპეციალურ კონტროლს დაქვემდებარებულ ფარმაცევტულ პროდუქტთან გათანაბრებული სამკურნალო საშუალებების გამოსაწერი ფორმა №2 ელექტრონული რეცეპტის ბრუნვის წესი“):

ა) მე-3 მუხლს მე-9 პუნქტის შემდეგ დაემატოს შემდეგი შინაარსის 9¹-9⁴ პუნქტები:

„9¹. რეცეპტის გამომწერი ექიმი ვალდებულია:

ა) უზრუნველყოს, რომ პაციენტზე გამოწერილი ფარმაცევტული პროდუქტის სადღეღამისო დოზა არ აღემატებოდეს ამ ფარმაცევტული პროდუქტის ინსტრუქციით დადგენილ მაქსიმალურ დღიურ დოზას;

ბ) სამედიცინო დოკუმენტაციაში ყოველი ინდივიდუალური შემთხვევისთვის კონკრეტულად დაასაბუთოს ფარმაცევტული პროდუქტის დანიშვნის აუცილებლობა;

გ) სრულწლოვანი პაციენტის შემთხვევაში ერთჯერადად არ გამოწეროს ფარმაცევტული პროდუქტის 14 სადღეღამისო დოზაზე მეტი, ხოლო 18 წლამდე ასაკის პაციენტის შემთხვევაში – 30 სადღეღამისო დოზაზე მეტი;

დ) თითოეულ ფარმაცევტულ პროდუქტზე (აქტიურ ნივთიერებაზე) ახალი რეცეპტი გამოწეროს, მხოლოდ იმ შემთხვევაში, თუ პაციენტს დარჩენილი აქვს იმავე ფარმაცევტული პროდუქტის (აქტიური ნივთიერების) არაუმეტეს 5 სადღეღამისო დოზის მარაგი;

ე) არ გამოწეროს რეცეპტი, თუ ელექტრონულ სისტემაში პაციენტს პარალელურად უფიქსირდება სხვა ექიმის მიერ გამოწერილი იგივე ფარმაცევტული პროდუქტის (აქტიური ნივთიერების) რეცეპტი და 5 სადღეღამისო დოზაზე მეტი მარაგი;

ვ) ფარმაცევტული პროდუქტის (აქტიური ნივთიერების) დოზის ცვლილების აუცილებლობის შემთხვევაში, გამოწეროს ახალი რეცეპტი, უკვე გამოწერილი ფარმაცევტული პროდუქტის რაოდენობის გათვალისწინებით და ამ პუნქტის „დ“ და „ე“ ქვეპუნქტების მხედველობაში მიღებით.



9. რეალიზებული ფარმაცევტული პროდუქტის დაკარგვის, დაზიანების ან განადგურების შემთხვევაში, ექიმი უფლებამოსილია, პაციენტის/მისი კანონიერი წარმომადგენლის/მინდობილობით აღჭურვილი პირის წერილობითი ახსნა-განმარტების საფუძველზე, გამოწეროს დაკარგულ/დაზიანებულ/განადგურებულ ფარმაცევტულ პროდუქტზე (აქტიურ ნივთიერებაზე) რეცეპტი ყოველდღიურად, 1 სადღელამისო დოზის ოდენობით (უქმე და დასვენების დღეების გათვალისწინებით, შესაძლებელია, გამოიწეროს შესაბამისი რაოდენობის დოზა მომდევნო სამუშაო დღის დოზამდე), მაგრამ არაუმეტეს დაკარგული/დაზიანებული/განადგურებული ფარმაცევტული პროდუქტის (აქტიური ნივთიერების) ჯამური რაოდენობისა.

9³. პაციენტის/კანონიერი წარმომადგენლის/მინდობილობით აღჭურვილი პირის მიერ რეცეპტის საფუძველზე რეალიზებული ფარმაცევტული პროდუქტის განმეორებით დაკარგვის/დაზიანების/განადგურების შემთხვევაში, ექიმს წერილობით ახსნა-განმარტებასთან ერთად, უნდა წარედგინოს, აღნიშნულ ფაქტთან დაკავშირებით, სამართალდამცავი ორგანოებისთვის მიმართვის დამადასტურებელი დოკუმენტი.

9⁴. ამ მუხლის 9² და 9³ პუნქტებით გათვალისწინებული შემთხვევების დადგომისას, ექიმი/სამედიცინო დაწესებულება ვალდებულია აღნიშნულის თაობაზე წერილობით აცნობოს სამინისტროს, პაციენტის ვიზიტიდან არაუგვიანეს 5 სამუშაო დღის ვადაში.“.

ბ) მე-4 მუხლს მე-9 პუნქტის შემდეგ დაემატოს შემდეგი შინაარსის 9¹ პუნქტი:

„9¹. რეალიზატორს არ აქვს უფლება ერთი რეცეპტის ფარგლებში გასცეს ფარმაცევტული პროდუქტი სრულწლოვანი პაციენტის შემთხვევაში 14 სადღელამისო დოზაზე მეტი, ხოლო 18 წლამდე ასაკის პაციენტის შემთხვევაში – 30 სადღელამისო დოზაზე მეტი.“.

მუხლი 2

ბრძანება ამოქმედდეს 2026 წლის 1 აპრილიდან.

საქართველოს ოკუპირებული
ტერიტორიებიდან დევნილთა,
შრომის, ჯანმრთელობისა და
სოციალური დაცვის მინისტრი

მიხეილ სარჯველაძე

